




La Via Serlas fa concorrenza al «Paradeplatz»

L'Engiadina ha seis Monopoly

DAD ANNATINA FILLI / FMR



La tabla dal Monopoly Engiadina cun fotografias dals differents lös.

FOTOS UNIQUE GAMING PARTNERS AG

■ Las ediziuns regionalas dal gö da tabla Monopoly sun retscherchadas. Eir l'Engiadina ha daspö d'incuort seis agen gö. Il Club da hockey da Tavo, il Grischun o eir la Svizra til han fingià. E daspö ün pèr dis eir l'Engiadina: Il gö da Monopoly, ün dals plü cuntschaints e populars gös da tabla. La firma «Unique Gaming Partners AG», cun sez a Triesen, es respunsabla per las ediziuns svizras regionalas dal gö da cult. Oriundamaing

deriva il Monopoly da l'America e vain giovà in 103 pajais.

Ediziun limitada

Che giodimaint schi's pudaiva cumprar «Turich» o «Losanna». E che dischilusi-un schi bastaiva be per «Cuoir». Daspö generaziuns vaina giovà a Monopoly. E grazcha a quist gö varà l'ün o l'oter impris a cugnuscher plü bain la Svizra. Uossa conquista il gö da tabla eir l'Engia-

dina e quai cun ün'ediziun speciala e limitada. San Murezzan, Susch, Zernez, Silvaplana o Scuol sun ün pèr dals lös i'l gö. Ed eir in Engiadina vaina giovà cun bler raps. E cun ün pa indschegn e furtüna as poja dvantar proprietari d'ün territori da skis o fabrichar chasas o hotels süen l'agen terrain. E cun quai dvantar l'Engiadinais il plü pussant – almain i'l gö da Monopoly. «Impè dal 'Paradeplatz' a Turich es pro quista versiun la Via Serlas a



San Murezzan il quader il plü cuostai-vel», manzuna *André Tschumper*, il manader da gestiun e da comunicaziun da la «Unique Gaming Partners AG». Oter sco pro'l gö original sun ils quaders illustrats cun üna fotografia dal lö. «Uschigliö sun il gö e las reglas las medemas sco l'original», declera'l. Las versiuns svizras existan da 22 vias e plazzas, quatter societats da bancas e d'ouvras d'aua e da forza electrica.

Success pels gös regiunals

La «Unique Gaming Partners AG» poseda exclusivmaing ils drets da licenza per individualisar il gö original da Monopoly. I'ls ultims ons han els realisà cun success 50 gös da citats e regiuns svizras. «Minch'on elavurain nus insembel cun ün team ideas e propostas che lös cha nus pudessan resguardar per l'on davo», uschè André Tschumper. Ils gös prodüan els ad agen risico e tils mainan svesa sül marchà, quai sainza avair ün mandat. «Cul Monopoly grischun vain nus gnü grond success. Quai ha intimà a nus da

far per l'Engiadina ün agen gö.» Tenor Tschumper es l'interess pel nouv gö grond, «quai conferma la vendita dal gö d'ürant ils ultims dis.»

Inventà in America

L'americana Elizabeth «Lizzie» Magie ha inventà da l'on 1904 il gö «The Landlord's Game», hoz il Monopoly. Ella sustgnaiva l'idea da la refuorma sociala. Il gö s'ha sviluppà e pro las variantas actualas guadogna il monopolist e'ls concurrents sun per finir insolvents.